

## Guna VSP salur maklumat kes jenayah

18 April 2017 3:00 AM



SEREMBAN 17 April – Masyarakat di negeri ini digesa memanfaatkan aplikasi Volunteer Smartphone Patrol (VSP) bagi melaporkan sebarang maklumat berhubung kes jenayah kepada pihak polis.



Mohamad Hasan

Menteri Besar, Datuk Seri Mohamad Hasan berkata, aplikasi mudah alih melalui telefon pintar itu membolehkan maklumat dihantar dengan cepat sekali gus dapat membantu dalam membasmi jenayah.

"Orang ramai boleh menyalurkan aduan atau maklumat yang dilengkapi dengan video, gambar dan koordinat GPS lokasi kejadian menerusi VSP kepada polis.

"Pada masa ini, semua orang memiliki telefon pintar dan saya harap mereka dapat menggunakan aplikasi ini supaya kadar jenayah dapat diturunkan," katanya.

Beliau berkata demikian ketika melancarkan aplikasi VSP peringkat kontinjen negeri sempena Hari Terbuka Polis Diraja Malaysia (PDRM) Negeri Sembilan di sini.

Yang turut hadir Ketua Polis Negara, Tan Sri Khalid Abu Bakar dan Ketua Polis negeri, Datuk Jaafar Mohd. Yusof.

Aplikasi VSP dibangunkan menerusi kerjasama dengan Unit Pemodenan Tadbiran dan Perancangan Pengurusan Malaysia (MAMPU) dengan PDRM di bawah Program Rakan Cop.